

Transkript sa konferencije za medije međunarodnih organizacija

OHR, Kevin Sullivan

ICMP, Doune Porter

OSCE, Elmira Bayrasli

EUPM, Zinaida Ilaria

EUFOR, Bridget Rose

NATO, Derek Chappell

OHR

Visoki predstavnik lobira za BiH kod Velike Britanije, budućeg predsjedavajućeg Evropske unije

Visoki predstavnik Paddy Ashdown boraviće sutra u Briselu i Londonu. Kao specijalni predstavnik Evropske unije, u Briselu će prisustvovati sastanku kojim će predsjedavati visoki predstavnik Evropske unije za zajedničku vanjsku i sigurnosnu politiku Javier Solana. Sastanku će također prisustvovati ostali specijalni predstavnici EU (njih sedam). Razgovori će biti fokusirani na buduću vanjsku politiku EU.

Ovaj sastanak održava se nakon što je Vijeće za implementaciju mira prošle sedmice najavilo da što prije BiH otpočne proces stabilizacije i pridruživanja, prije će Vijeće za implementaciju mira doći u poziciju da pokrene proces postepenog povlačenja OHR-a i prelazak na Ured specijalnog predstavnika Evropske unije.

Što se tiče Balkana, na sastanku će se razmatrati politika EU u pogledu ambicija ove regije da otpočne proces pristupanja Evropskoj uniji. Veoma značajan ekonomski, vojni i politički angažman EU u ovoj regiji, a posebno u BiH, najbolji je

pokazatelj opredijeljenosti Evropske unije. Međutim, učesnici sastanka također će konstatirati da i BiH mora dokazati da je opredijeljena za početak procesa pristupanja EU, i to provedbom neophodnih reformi. Sudionici sastanka će ukazati da političke izjave moraju biti podupriete rezultatima. Sve dok se ne realizuju neophodne reforme, napredak BiH ka EU će biti blokiran.

Kasnije tokom dana visoki predstavnik će otputovati u London, gdje će se sastati sa ministrom vanjskih poslova Velike Britanije Jackom Strawom. Tema ovog sastanka također će biti trenutni status BiH u napretku ka evro-atlantskim integracijama. Kao što vam je poznato, Velika Britanija uskoro preuzima šestomjesečno predsjedavanje Evropskom unijom. U razgovorima sa ministrom vanjskih poslova visoki predstavnik će obrazložiti politički i parlamentarni plan kako bi BiH maksimalno iskoristila preostalu šansu da pređe prag ka pregovorima o Sporazumu o stabilizaciji i pridruživanju prije obilježavanja desete godišnjice Dejtona.

Poljoprivrednici u BiH imaju puno pravo da zahtijevaju koordiniranu poljoprivrednu politiku

Ured visokog predstavnika sa žaljenjem konstatuje da su bh. poljoprivrednici dovedeni u poziciju da osjećaju da moraju protestirati protiv sporazuma o slobodnoj trgovini. Suština problema uvoza poljoprivrednih proizvoda ne leži u samim sporazumima o slobodnoj trgovini, već u neuspjehu bh. organa vlasti, na državnom i entitetskom nivou, da organiziraju, upravljaju i pružaju podršku poljoprivrednom sektoru na kompetentan i optimalan način.

Ured visokog predstavnika podržava apel poljoprivrednika za adekvatno koordiniranom poljoprivrednom politikom na nivou BiH. S tim u vezi OHR poziva državne i entitetske vlasti da bez odlaganja sazovu sastanak Radne grupe za poljoprivredna

pitanja, kako bi se implementirale preporuke date u Pregledima Evropske unije po sektorima – Pregled poljoprivrede u BiH.

Poljoprivrednici u BiH protestiraju jer vlasti nisu uspjele da uspostave koordiniranu poljoprivrednu politiku koja postoji u svakoj drugoj evropskoj zemlji. Kada ova koordinirana politika bude formulirana i implementirana, bh. poljoprivrednici i potrošači će imati koristi od Sporazuma o slobodnoj trgovini o kojima je pregovaralo Vijeće ministara BiH.

Viši zamjenik visokog predstavnika u posjeti Mostaru

Viši zamjenik visokog predstavnika Martin Ney u četvrtak će prvi put službeno posjetiti Mostar. Tokom ove posjete ambasador Ney će se susresti sa gradskim i kantonalnim zvaničnicima, uključujući načelnika Ljubu Bešlića i predsjednika Gradske skupštine Murata Čorića. Nakon sastanka sa načelnikom i predsjednikom Skupštine biće upriličena kratka izjava za medije u zgradi Gradske uprave, u 12:45 sati. Detaljnije informacije o ovom događaju dostavit će Ured za odnose sa javnošću Gradske uprave. Na završetku ove posjete zamjenik visokog predstavnika Martin Ney sastat će se sa kantonalnim premijerom Miroslavom Čorićem.

Tokom njegove prve posjete ambasador Ney će biti informiran o napretku koji je do sada ostvaren u provedbi novog Statuta Mostara i dosadašnjim uspjesima u ukidanju paralelnih struktura i pretvaranju Mostara u normalan evropski grad.

Prvi zamjenik visokog predstavnika, poslodavci i buldožer komisija razgovaraju o načinima unapređenja metoda za utvrđivanje politika u BiH

Prvi zamjenik visokog predstavnika Larry Butler će se pridružiti predstavnicima sindikata i poslovnog sektora na

današnjem okruglom stolu koji se održava u prostorijama sjedišta Sindikata u Sarajevu, kako bi istražili načine za davanje značajnije uloge radnicima, poduzetnicima i poslodavcima u procesu utvrđivanja i donošenja politika u BiH. Po završetku okruglog stola organizovat će se kratko obraćanje medijima, od 14:15 do 14:30 sati.

Dom naroda može osigurati mnoge prednosti za građane BiH

Sutra je u Domu naroda BiH zakazano konačno čitanje Okvirnog zakona o dugu, Zakona o željeznicama i Zakona o javnom RTV sistemu.

Svaki od ovih zakona, kada bude implementiran, će donijeti značajne koristi građanima Bosne i Hercegovine.

Zakonom o javnom RTV sistemu će se uspostaviti moderan, ekonomičan i jedinstven sistem javnog emitiranja za cijelu zemlju, sistem koji će odražavati kulturne, jezičke i vjerske raznolikosti svih konstitutivnih naroda u BiH. Pored toga ovaj zakon je, kao što znate, jedan od dva preostala uslova iz Studije izvodljivosti Evropske komisije. Ukoliko zakon bude usvojen, Dom naroda BiH će ukloniti jednu od posljednjih prepreka na putu ka Evropi.

Okvirnim zakonom o dugu stvorit će se uslovi za formiranje funkcionalnog tržišta obveznicama. To će organima vlasti u BiH osigurati mehanizam, kakav koriste vlasti u svim razvijenim ekonomijama, da prikupljaju novac izdavanjem obveznica. Ovaj zakon je dio sveobuhvatnog plana za izmirenje duga kojim je predviđena dodjela naknada svim stranama koje imaju potraživanja prema organima vlasti, dok je istovremeno osigurano da organi vlasti mogu podnijeti izmirenje obaveza. Time će se ukloniti dosadašnja posljednja prepreka unutaršnjim ulaganjima. Uklanjanjem ove prepreke otvorit će se mogućnosti za nova radna mjesta.

Zakon o željeznicama dio je opsežnijeg procesa transformacije sektora željeznica u BiH i otvaranja tog sektora za strana i domaća ulaganja. Činjenica je da se privreda može razvijati samo do izvjesne granice sa željezničkim sistemom koji je u tako lošem stanju. Preduzeća bi mogla proizvoditi više robe, ali tu robu ne mogu plasirati na tržište ako ne postoji adekvatan željeznički vozni park za transport takvih roba. Dakle, ovdje se ne radi samo o željeznicama, već o privredi u cjelosti.

Dakle, ako Dom naroda može obavljati svoje dužnosti efikasno i racionalno, osigurat će mnoge prednosti za građane ove zemlje. Ukoliko ne uspije u tome, napredak cijele zemlje će biti blokiran.

ICMP

Kako se približava obilježavanje desetogodišnjice pada Srebrenice, željela bih vam dati najnovije podatke o identifikaciji srebreničkih žrtava.

Do danas, ukupan broj žrtava iz Srebrenice koje je identifikovao ICMP je 2070.

Ovaj broj uključuje više od petsto žrtava koje će biti ukopane u Potočarima 11. jula ove godine.

Jutros je forenzički patolog ICMP-a dr. Rifat Kešetović završio identifikaciju 570. žrtve iz Srebrenice koja će biti sahranjena za vrijeme ceremonije.

Prošle sedmice rekli smo kako vjerujemo da će oko 550 tijela biti sahranjeno, ali kao što možete da vidite, radili smo naporno na identifikaciji što je više moguće žrtava i već smo premašili tu brojku.

Međutim, u ovom trenutku nismo sigurni koliko će vremena trebati da se sva identifikovana tijela pripreme za ukop, tako da u ovom trenutku neću pokušati dati precizniju procjenu koliko će srebreničkih žrtava biti ukopano tokom ceremonije.

Do sada 350 tijela je premješteno iz ICMP-ovog identifikacijskog projekta Podrinje u Tuzli u Gradska groblja Visoko koja će pripremiti tijela za ukop. Sljedeće sedmice i preostala tijela će biti prebačena u Visoko.

Također želim reći da je Međunarodna komisija za nestale osobe poslala još dva stručnjaka u Phuket na Tajlandu da pomognu u naporima da se identifikuju žrtve cunamija.

ICMP-ev DNK stručnjak Rijad Konjhodžić, koji inače radi u sjedištu ICMP-a u Sarajevu, i stručnjak za kompjuterski program za DNK podudarnost Zlatan Bajunović, koji radi u ICMP-om Odjelu za koordinaciju identifikaciji u Tuzli, otputovali su jučer na Tajland.

U laboratoriji ICMP-a u Sarajevu trenutno izdvajamo DNK profile iz uzoraka kostiju žrtava cunamija koji su poslani s Tajlanda, te vršimo njihovo podudaranje s referentnim DNK uzorcima, također dobijenim s Tajlanda. Rijad i Zlatan će vršiti konačnu provjeru izvještaja o podudarnosti uzoraka na Tajlandu prije nego ih predaju vlastima Tajlanda.

Na kraju želim naglasiti da napori koje ICMP ulaže u identifikaciju žrtava cunamija ni na koji način ne ugrožavaju identifikaciju nestalih s područja bivše Jugoslavije. Kao što možete vidjeti na osnovu broja identifikovanih srebreničkih žrtava do sada, naša predanost ovoj regiji nije oslabila. Štaviše, Vlada Tajlanda financira rad na identifikaciji žrtava cunamija. Donacije Vlada za ovaj region se isključivo koriste ovdje.

Nije bilo izjava.

EUPM

Nije bilo izjava.

EUFOR

Nije bilo izjava.

NATO

Nije bilo izjava.